



Komunikadu Imprensa
17 Abril 2023

JSMP no autór tribunál hala'o sesaun dezaminaun informasaun ba autoridade lokál nomós komunidadade iha suku Lifau no Suku Samalete

Iha 17 Abril 2023, JSMP realiza dezaminaun informasaun kona-ba prosesu justisa fomál ba autoridade lokál nomós komunidadade hamutuk ema nain 35 iha suku Samalete, Postu Administrativu Railaku, Munisípiu Ermera no iha 28 Marsu 2023 sesaun dezaminaun informasaun mós hala'o iha Suku Lifau, Postu Administrativu Pante Makasar ho totál partisipante hamutuk ema nain 31. Iha dezaminaun informasaun ne'e kobre topikuku sira spesífiku ko'alia kona-ba definisaun husi lei no krime, natureza krime no oinsa atu lori kazu sira ba iha prosesu justisa formál nomós tipu pena.

“ JSMP kontente tanba bele tulun autoridade lokál nomós komunidadade Suku Samalete iha hasa'e sira nia koñesimentu kona-ba prosesu justisa formál ne'ebé sai hanesan parte ida iha akordu memorandu ba intendimentu entre Suku Samalete ho JSMP iha programa apoiu ba justisa komunitáriu. Prosesu ida ne'e mós hanesan parte importante hodi responde ba preokupasaun ne'ebé estrutura suku no komunidadade sira hato'o iha asesmentu ne'ebé JSMP halo bainhira atu hahú serbisu hamutuk ho suku ida ne'e,” dehan Sra. Ana Paula Marçal, Diretora Ezekutiva JSMP.

Iha sesaun dezaminaun informasaun ne'ebé hala'o iha Suku Lifau, estrutura suku no komunidadade sira kestiona liu kona-ba implementasaun Lei Kontra Violénsia Doméstika, ne'ebé la autoriza inan-aman baku oan, enkuantu parte sira konsidera asaun baku ne'e la'os atu diskrimina oan maibé hanesan parte ida husi eduka. Hatan ba ida ne'e, Dignisímu prokuradór Dr. Mateus Nessi no Sra. Ana Paula Marçal, Diretora Ezekutiva JSMP hateten katak lei la autoriza kualker ema ida halo violénsia ba ema se de'it inklui ba membru família. Partisipante sira mós husu kona-ba oinsa sekarak feen ho la'en deside lakohi malu no halo tiha akordu iha suku maibé bele kala'e se karik ikus sira deside fila fali ba malu, hatan ba ida ne'e Xefi Defensor Públiku Ditsritál Oekusi Dr. Afonso Gomes Fatíma hateten katak, iha lei kazamentu konsidera hanesan akordu ne'ebé realiza entre parte rua, nune'e bainhira deit parte ida deside hakarak atu fila fali ba malu, lei la bandu tantu akordu ne'ebé realiza iha justisa komunitáriu. Entretantu, Sekretáriu Judisiál Tribunál Primária Intánsia Oekusi Dr. Johanes Narro subliña katak lider lokál labele tesi lia tanba lei la fó dalan maibé bele halo deit mediasaun ba parte rua no tenki hetan konkordánsia. Enkuantu krime publiku bele rezolve tuir kultura maibé nia prosesu mak labele taka no kontinua ninia prosesu to'o hetan desizaun husi tribunál.

Iha dezaminasaun informasaun iha Suku Samalete, estrutura suku no comunidade sira hato'o preokupasaun barak liu kona-ba saida mak sira tenki halo iha kazu alimentasaun bainhira parte sira la simu malu iha rezolve ba prosesu justisa komunitáriu no kazu balun ne'ebé feto balun isin rua maibé mane nega hodi lakohi responsabiliza. Hatan ba pergunta sira ne'e, JSMP esplika katak iha prosesu rezolve disputa komunitáriu, estrutura suku hanesan mediadór nune'e desizaun depende ba parte sira, ho nune'e bainhira sira laiha konkordánsia, bele tulun parte sira hodi lori sira nia prosesu ba tribunál ne'ebé hanesan fatin ikus liu hodi foti desizaun ba sira nia kazu. Enkuantu kona-ba mane ne'ebé nega ba labarik iha feto nia isin, JSMP esplika katak ida ne'e tama iha prosesu sivíl ne'ebé parte sira bele halo teste DNA bainhira labarik moris ona no ida ne'e agora dadaun ezaminasaun ida ne'e bele halo iha ita nia rain tanba unidade PSIC iha ona facilidade ba ida ne'e.

Realizasaun ba dezaminasaun informasaun ne'e hanesan parte ida husi akordu memorandu ba intendimentu entre Suku Samalete ho JSMP iha programa apoiu ba justisa komunitáriu. Iha dezaminasaun informasaun ne'e partisipa husi Xefi suku, Xefi aldeia, lia nain suku no aldeia, membru KPK, representante uma lisan no comunidade sira.

Programa Apoiu Seguransa Komunitariu (PASK) nu'udar serbisu hamutuk entre JSMP ho The Asia Foundation (TAF) ne'ebé finansia husi Embaixada Nova Zelandia hodi halo peskiza kona-ba oinsá efektu husi justisa komunitáriu ba rezolve disputa sira iha comunidade.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>